

# 六朝四家全集（二）

〔清〕胡风丹 辑

许逸民 校点

新世纪万有文库  
—— 新世纪



辽宁教育出版社

新世纪



新世纪万有文库

本文库为国家“九五”重点图书出版规划项目

017/019

〔清〕胡凤丹辑 许逸民 校点

# 六朝四家全集（二）

辽宁教育出版社

# 庾开府集卷一下

周 庾信 著 永康胡风丹月樵甫校梓

## 神道碑

### 周上柱国齐王宪神道碑

昔者轩皇受姓，十有四人；周室先封，十有五国。自尔承基纂胄，保姓受氏，虽复千年一圣，终是百世同宗。故知昔之东京，既称炎汉再受；今之周历，即是酆都中兴。

公讳宪，字毗贺突，恒州武川人也。晋太康之世，据有黄龙；魏孝昌之初，奄荒玄菟。太祖以百二诸侯，三分天下，函谷先登，鸿沟大定，功业如此，人臣以终。公含章天挺，命世诞生。降太一之神，下文昌之宿，珠角擅奇，山庭表德。仪范清泠，风神轩举，耸动廊庙，光华城阙。未逾韶髫，已议论天下事。人或曰：“是谓弱木一枝，旁荫数国，长河一直，自然千里，风飏欲远，光景将升。”后魏二年，封涪城县开国公，时年五岁也。

虹蜺满野，是废当途之高；鸞鸞鸣岐，实始维新之命。国家光宅受图，钦明秉历，大风初卷，长沙始封。周元年，进爵安城郡公，食邑二千户，仍授使持节、骠骑大将军、开府仪同三司。开府同于马骏，秩拟六卿；骠骑等于刘苍，位高三事。宗子维城，彼多惭色。

武城二年，授使持节、大将军、都督益寿宁等二十四州诸军事、益州刺史，改封齐国公，食邑万户。公时年十有六。王武子上将开府，未立年；荀中郎为十州都督，才逾弱冠。方之于公，已为老矣。加复营丘负海，齐桓公受脤之城；岷山导江，汉武帝求仙之地。自非名陵孤竹，声振沉黎；岂得南至穆陵，西登积石？幸无白虎之患，宁待黄龙之盟？邛笮畏威，微卢仰德，生为立庙，刻石颂功。成都有文翁之祀，非谓生前；汉阳有诸葛之碑，止论身后。比之今日，岂可同年而语哉！

保定四年，与大司马蜀国公围金墉城。师临洛浦，则广武营奔；兵上邙山，则河桥路断。八川风俗，五方名利，铁市铜街，风飞尘起。天和元年，征还，行雍牧。公以日月之明，威神其政，漆沮既从，荆岐即义。少阳用事，路不喘牛；仲秋以殷，民无惊水。二本传作三。年，拜大司马，仍理小冢宰、营室殿军器太监。天官以邦国为基，是司六典；夏官以兵戈为主，专谋七德。是以器械填委，既包吴汉之功；宫殿峥嵘，弥壮萧何之法<sup>①</sup>。时以白露凉风，务闲农隙，督兵三万，出自宜阳，拔伏龙之城，平姚萇之垒。马陵削树，魏将路穷；平阴听乌，齐师其遁。天子冢弟，礼绝群公，仁义所往，事资道德。建德元年，进爵为王，仍拜大冢宰。姬旦封于曲阜，不废居中；刘交国于彭阳，无防常从。岂直周、召二南，并居师傅；晋、郑两国，俱为卿士而已哉！

匈奴突于武川，燿火通于灞上。公述职巡御，治兵朔方。马邑星飞，龙城月动。挠留犁之酒，经略不前；失燕支之山，下马而去。东邻逆命，返道败德，囚箕子于塞库，骂文王于玉门。天子将有孟津之师，召公独议。公报以诞膺天命<sup>②</sup>，克成厥勋。昔者秦昭起师于蜀，直问张仪；晋武用兵于吴，惟谋羊祜。于是中军无帅，金曰有归。

五年，拜上柱国。元戎东讨，给王铁骑二万，先袭太原。斗建麾兵，天离转战，虎啸风腾，云飞电掩。林胡枣栗，讵得充饥；

晋阳获蒿，何能拒防？又加王精兵六万，长围晋州。然后六军星陈，万骑雷动，中权始及，前茅已战。自尔即为前锋，横行入邺。观彼车结槐木，马惊旋泞，积甲高昆阳之城，尸封塞富平之水，莫不如彼建瓴，同斯破竹。一朝指挥，六合大定。是用光昭《下武》，翼亮中都，足以抒祖宗之宿愤，解生民之怨黷。方当待彼石闾，部斯玉鼓，经纬天地，光华日月。既而赤乌夹日，黄熊入寝，实沉无祀，桑林不祭。宣政元年六月二十八日薨，春秋三十有四。季友之亡，鲁可知矣；齐丧子雅，姜其危哉！

公器宇淹旷，风神透远，玃镜照林，山河容纳，置樽待酌，悬钟听扣，声动天下，光照四邻。武皇帝以介弟懿亲，特垂爱友，而密谋奇策，加礼敬焉。常谓左右曰：“孔子云：‘自吾有回，门人日亲。’其齐王之谓也。”用之作宰，则万方协和；用之抚军，则四表慑伏。岂直皋由为士，国无不仁；随会为卿，民无群盗。爱玩书籍，敦崇礼乐。管弦入耳，则溪谷俱调；文雅沿心，则烟霞并韵。养由百发，落雁吟猿；应奉五行，绋纆缥帙。雍容举止，抑扬谈论，当世以为楷模，搢绅以为轨范。则少有壮志，颇校兵书，玄水降灵，穀城授策，飞凤长柳，月角星眉，莫不吟诵在心，撰成于手。所著兵法，凡有五卷。六韬九法，不用吴起旧书；三令五申，无劳孙武先诫。可谓有忠孝焉，有壮武焉。不自骄矜，谦光下物。宋人献玉，不贪为宝；伯成子高，守仁为富。不谓以信致欺，为善非乐，天年不享，呜呼哀哉！以某年月日，葬于石安县洪渎川之里。原隰凄怆，埋于盛德几年；邱陵摇落，蕴于良才永矣<sup>③</sup>。乃为铭曰：

悠哉朔方，逝矣穿阴。山连鸟道，地尽龟林。重黎业大，伯翳功深。胄其积德，必有君临。太祖拨乱，丧君有君。功回地轴，策动天文。犹临赤水，尚复黄云。诸侯八百，天下三分。公之挺生，实惟天假。翠微神降，文昌星下。照于四国，充于两社。舟楫江河，栋梁华夏。水涌词锋，风飞文雅。纯深之性，地极天

经。忠贞之道，事感百灵。君亲惟一，臣子惟宁。忠泉出井，孝笋生庭。乃宰天官，为国之辅。是居上将，为天之柱。乃圣乃神，惟文惟武。策高开辟，威移云雨。九宫神略，三术谟明。天离转阵，月德回兵。黎阳水骇，官渡山惊。冀州既载，东原底平<sup>④</sup>。溟波欲运，弱木将危。中峰岳断，半海鹏垂。凤沉丹穴，龙亡黑陂。临淄废市，东武山移。千龄万古，英声在斯。

### 周太子太保步陆逞神道碑

公讳逞，字季明，本姓陆，吴郡人也。君子至止，既绍虞宾；凤凰于飞，实兴齐国。南越使者，解汉帝之衣；西陵将军，覆吴王之盖。曾祖载，为宋王司马，留镇关中。赫连之乱，伏剑魏室。黄河参陵，或亡追路；乌江舣船，更无归迹。今为河南洛阳人也。高祖，冠军将军、营州刺史。吴人有降附者，悉领为别军。自是官师拥铎，更为吴越之兵；君子习流，别有楼船之阵。父，政骠骑大将军、仪同三司、恒州刺史、中都献公。太祖扶危济倾，经纶夷阻；报君之耻，远袭平原。以高平霸业所基，委命留事。关中馈食，非直荥阳之师；河内供军，岂但淇园之竹。

公秉照晋之灵，降明神之德。猛虎振槛，七年不惊；羝羊触藩，九龄能对。诸兄以公先君爱子，称之曰仁，推而袭封。虽复季末，大成之心守节。疑有阙误。既遭燠穴，翻从压纽。太祖初封咸谷，始合诸侯，以公词令，参谋机密，故得戎政克宣，师言无漏，赐姓步陆孤氏。委鹿轂而论都，入鸿门而舞剑，方之吹律，绰有馀荣。出身羽林监、轻车将军，除尚书右丞。官联会计，务应平准，水衡贯朽，常平粟红。授使持节、车骑大将军、仪同三司，增邑千户。寻迁驾部中大夫，领吏部中大夫<sup>⑤</sup>，历藩部、御伯<sup>⑥</sup>。东京鼎实，先加邓陟之勋<sup>⑦</sup>；西晋官人，多用山涛之启。岂若五王登朝，必司宾主之礼；六龙御辔，取定鸾和之节。御正以官触

父名，不拜。会稽有王会之名，其子不为太守；博陵有王沉之封，其儿不为刺史。迁骠骑大将军、开府。入掌纳言，治司宗伯。又为军司马。职居常伯，勤问于南宫；位管王言，连官于北斗。岂止郊天祀地，龙门嶰谷之声；赞鼓颁旗，白露凉风之月。暗夜有人餽罗数十匹，公闭门不受。行人干触，具以闻奏，朝野称之。太尉杨震，直推故吏之金；凉州张奂，高揖羌人之马。清畏人知，我无惭德。

齐国通和，封人受使。以公有出境之才，见命张旛之礼。既珠盘敌血，定楚国之连名；匕首登坛，反齐人之侵地。是谓使乎，固称光国。三辅公侯<sup>⑧</sup>，五陵钟鼎，桐街柳市，尘起风飞。乃授京兆尹，增邑通前一千六百户，馀官如故。上林兵息，兰池盗静，不学王阳平生铸金之术，未同张敞终日章台之游。家僮暮行还，得遗钱于道，并白绳十匹。公访得其主，即以还之。见金于路，指以示人；得钱于道，留持挂树。方之今日，异代同风。俄迁司会，治小司马。重总六军，再操八柄。考绩入于岁成，论功书之《年表》。寻授都督宜州诸军事、宜州刺史。露冕观风，停车待雨。百城解印，惮朱穆之威；千里相迎，爱王基之德。曾未期月，被敕追还。眷眷吏民，不无河内之请；依依故老，实念黎阳之别。少阳养德，前星守器，尊师让齿，必俟贤能。乃授太子太保。方之刘实，道高于大邦；譬以山涛，荣深于小辇。

本有消渴之疾，常饵金石自理。旧疾微增，奄捐馆舍。茂陵之下，不留封禅之书；校尉之营，惟馀服食之器。呜呼哀哉！春秋四十有七，建德二年五月十一日也。天子以大臣之丧，躬辍听讼；东朝以师傅之尊，亲临攒祭。诏赠大将军，谥某公，礼也。以今三年正月十日，葬于京兆之高阳原。夫人郁久闾，西遇王姬，受敬肃恭，言容令淑，有闻箴盥<sup>⑨</sup>，无废絃纒。爰在盛年，先从大夜。今节妇开坟，松柏已拱；季孙成寝，丘陵始同。况复图画贤妃，方在甘泉之室；瘞埋才子，即用高阳之原。

公仪表外明，风神内照，器量深沉，阶基不测<sup>①</sup>。事君惟忠，事亲为孝，言为世范，行为士则。留连《坟》、《素》，招怅文词，霜府录于尚书，天官总于司会。出入匡赞，常带数职，身具六龟，腰恒四绶。陈平密谋，既非天子所见；荀彧上策，又非诸侯所闻。其为郡也，惟取赤土封书；其为州也，唯以青盐换粟。留家则千树无资，遗子则一经而已。嫡子操，至性过礼，纯孝不遗。坟前之树，染泪者先枯；庭际之禽，闻悲者则下。铭曰：

山连日观，水枕滇机。富春沙起，开阳柱飞。大夫屈节，将军振威。南越受吏，西陵解围。昔我烈祖<sup>②</sup>，垂翅秦中。白马无路，乌江不通。笛吟乡里，琴哀土风。营州恒州，拥旆世载。壮节旃衿，人雄关塞。直河穿赵，平云临代。生谓立功，没为留爱。降兹岳渎，诞此贞明。祥符云气，庆合星精。宫帷定策，殿柱书名。忠泉暗漏，孝笋寒生。世属殷周，时逢楚汉。天下三分，鸿沟一半。以我明略，来参匡赞。日乃再中，天成两旦。递参三事，历副六卿。天司光宅<sup>③</sup>，地载谟明。春官定礼，夏官治兵。讖言默识，温树无名。谦恭周密，言行无乖。忠公兕觥，阴德蛇埋。军国纷总，部邻瑱阶。一作借。马不入厩，金不入怀。具瞻惟德，高山惟仰。甲观初登，龙楼初上。东国桓荣，西京疏广。年龄俄顷，风电相摧。铭旌两没，池柳双回。茕茕胤子，御疾衔哀。身彰野火，心惧天雷。月日其除，荣终哀始。马归司隶，书还太史。历对天星，坟连地市。山势接飞，松形盖起。德音无绝，平原忽矣。

### 周大將軍司馬裔神道碑

公讳裔，字遵胤，河内温人也。昔颛顼之命，始则南正司天；重黎之后，又以羲和掌历。夏阳适晋，得随会而同奔；东海避秦，与毛公而俱隐。其后金行受命，玉笥南迁，帝乡极于舆图，中朝



至于江表。

曾祖楚之，晋太傅、录尚书、扬州牧，会稽文孝王之次子，元显之幼弟也。元显见害之后，桓玄篡逆之初，爰自韶龀，客身屠钓。河内道左，抱剑长号；代郡城前，恸悲灵祭。江淮志节之士，汝颍风尘之客<sup>⑬</sup>，感激一言，咸多依附。既而云生伏龟，星出鲸鱼，太白经天，蚩尤映野。公乃收合馀烬，泣血登陴，临武牢之关，据成皋之坂，拥众万家，归于魏室。魏明元皇帝遥授平南大将军、荆州刺史，袭封琅玕郡王，尚河内公主。命王承制，从宾国之仪。于时宋兵凭陵，旗鼓侵逼，虎牢不封，金墉无援。魏太武皇帝授王使持节、侍中、安南大将军、开府仪同三司，给前后部鼓吹。元戎启行，志雪冤耻，登坛慷慨，三军掩泣。黄河漕粟，已出石门；白马连旗，将临野坂。既而云中柝起，代郡烽燃，反旆南辕，途穷北略。赠征西大将军、都督梁益秦宁荆兖青豫郢洛十州诸军事、扬州牧、司徒。谥贞王。祖金龙，封琅玕镇西大将军、仪同三司、吏部尚书，赠司空，谥康王。父悦，镇南将军、豫州刺史、渔阳庄侯。以荆河刺举，时值乱离，衅起萧墙，遂终非命。

公遗腹载诞，流离寇逆，复璧襁负，深山拥树。程婴之匿赵武，从役家臣；王成之藏李燮，为佣酒市。遭太夫人忧，苦草坟莹，以终灰燧，形骸毁瘠，逾于丧礼。年十有五，始干家事。楹前凿柱，即取遗书；石上开松，仍求故剑。出身司徒府参军，除中坚将军、员外散骑常侍。值魏室多难，所在烽起。孟津以北，无复封畿；嵩山以南，即为锋镝。公建议修武，立栅温城，函谷西封，河桥北断。长亭籍马，并入武城；百里租车<sup>⑭</sup>，咸输温县。

太祖文帝缔构关都，经纶夷阻，招携以礼，怀远以德。马文渊之择主，去陇坻而归身；窦周公之入朝，在河西而奉诏。大统七年，蒙授平东将军、北徐州刺史。十年，河内故义四千馀家，愿立忠诚，须公衣锦，乃授使持节、领河内太守，加前将军。怀州拓境，两镇奔波；柳泉转战，三城授首。十三年，太祖召山东诸立义

之将，能率众入关者，有加重赏。公率先而至，领户千室，即以为封，固辞不受。其菽粟之赐，或以指困；马牛之赏，将同量谷。

朝廷以华阳西极，汉水东流，叹孟达之奔兵，怪刘封之失策。魏前元年，移镇汉中，除白马城主，领华阳郡守。昔称导汉，今闻上瀦，烟沉冰井，雨歇云门。其年，授大都督，加散骑常侍。柱国蜀国公开金牛之道，通牧马之关。公卷甲北塞，悬车束马，遂得策预葭萌，勋参绵竹。封龙门县开国子、蒲州刺史，仍领新州。寻授使持节、车骑大将军、仪同三司、大中正。

隆周授图，天保大定。以公才望，仍为旧臣。遂乃义深追远，恩隆继绝，即改封琅琊县公，邑五百户，仍迁骠骑大将军、开府仪同三司、都督巴州诸军事、巴州刺史。武成二年，被敕赴援信州。鱼复道阻，屡却岑彭；荆门水急，几沉吴汉。公乃月峡先登，瞿塘直上。天子以公操履忠勤，仪刑亮直，乃征为大御伯。寻转大御正，邑一千一百户。枢机近侍，出纳丝言，所谓多识旧章，殿中无双者矣。

四年，大军东讨，公所领义众先守枳关，授都督怀州诸军事、怀州刺史。偃师张幕，河阳牧马，虽接战于富平，已连营于官渡。五年，诏追还，拜始州刺史。更讨信州，贼山彰、寻宝渝恃险，峡路五尺，绶约才通，县水三门，桥飞齐渡。既而风行草偃，谷静山空，前后平十一城，获九千余口。马归平乐，金输水衡。天保二年，除信州刺史、都督信州诸军事。朝发白帝，暮宿江陵，气振巴丘之兵，威警建平之戍。五年，迁潼州刺史。

益州柱国公降帝子之重，镇天井之星，延阁拟于丛台，岷山方于代郡。公仰稟雄谟，参谋远略，故得身预舞阳之功，位极长平之宠。六年，授使持节、大将军、大都督西宁州诸军事、西宁州刺史。方欲关沫若，徼群豺，见夜郎之侯，习昆弥之战，而飞鸢堕水，马援去而无归；金马骋光，王褒行而不反。呜呼哀哉！七年正月十日薨，春秋六十有五。诏赠使持节、大将军、怀邵汾晋四

州诸军事、怀州刺史。

夫人襄城公主，魏献帝之曾孙，赵穆王之季女。王姬肃恭，綸翟礼典，四教兢庄，三星令淑。有光隆虑之贤，足表平阳之盛。生则从夫以秩，死则同穴以礼。建德元年八月十二日，合葬于武功三时原。大夫墓树以柏，诸侯坟高于雉。吁嗟滕公，来居此里。诏谥定公，礼也。

公资忠履孝，蕴义怀仁，直干千寻，澄波万顷。逢蒙射法，力牧兵书，星辰高下之占，风雨逢迎之气，故得师出以律，天幸将军者也。至如官曹案牍，未常烦壅，戎马交驰，不妨馀裕，足使四岳弥峻，三台更明。在朝四十一年，身经一百馀战。凡任四郡，历八州，未尝以货殖经怀，去如始至。渭南千亩之竹，更惧盈满；池阳二顷之田，常思止足。身歿之日，家无馀财。素车白马，狭室崎岖；黄肠玄甲，阶庭仄陋。有诏冬官，为营寢室。朱邑祭酹无所，汉后是以赐金；陈表妻子露立，吴王为之开馆。呜呼哀哉！

世子侃，孝家忠国，扬名显亲。是以勒此丰碑，惧从陵谷；植之松柏，不忍凋枯。铭曰：

钦若历象，平秩寅宾。少梁奔华，地入咸秦。族夷兴马，书穷获麟。玉镜云始，金行乃构。象浦通关，龙沙开候。上糝石起，河阳水斗。五马南浮，三星东宿。太傅作牧，奄有江沱。司徒避乱，承制荆河。南劳推毂，犹思枕戈。龙媒被野，苍兕凌波。庄侯季年，祸机相接。诞公遗嗣，崎岖怀挟。山窜赵武，家藏李燮。伍员道阻，燕丹路遥。南奔楚塞，北避秦桥。水流登陇，寒风度辽。有功都护，则重嫖姚。怀书上马，习礼从戎。阵图六甲，兵占八风。藏松宝剑，射柳珣弓。推诚贾复，屈节廉公。八翼频飞，六条亟秉。勇此仁义，行兹宽猛。持印山开，沉黎盗静。取甲无丘，均田不井。懋功赐爵，上将赏官。军中受诏，塞外登坛。方屠参合，更麇皋兰。渝川毒水，焚道灾氛。地亡都尉，淮悲使君。谷寒无日，山空足云。北风吹旆，秋霖泣军。遗奠双

设，铭旌两布。沁水同坟，平阳合墓。悲哀嗣子，攀号靡诉。恻甚风枝，悲深霜露。自此何世，从斯几年。麒麟欲斗，华表中燃。地形楼起，松心盖圆。茫茫丘垅，代代英贤。

### 周柱国大将军长孙俭神道碑

盖闻放勋立而羲和升，重华登而元凯用。思皇多士，既成西伯之功；俊德克明，乃定南巢之伐。是知惟贤非后弗食，惟后非贤弗义。若夫君臣一德，启心沃心，见之昌宁文公矣。

公讳俭，初名庆明，恒州高陆人也。北岳天孙之星，燕河帝子之国，故多奇节，甚茂华风。高阙图南，二王齐轸；长城拔本，十族分源。高祖，太尉、北平王。光辅五君，允厘百揆，恒、卫既从，淮、沂其义。祖豹，龙骧将军、恒州刺史。常山刺举，非无取代之符；龙骧总戎，或似平吴之号。父馘，年止弱冠，荣终解印。

公以五常蕴智，六气资德，乘天则策马秉灵，降神则牵狼应象。直心于物，水火恬然；无负于天，雷霆不惧。富贵自取，岂资唐举之言；声名有闻，无劳李膺之识。年十八，解褐员外散骑侍郎。寻授轻车将军、羽林监。太祖文皇帝驾馭天纲，苞罗英杰，选公才德，光佐中书。诸葛亮之西归，玉垒成三分之业；管夷吾之入仕，葵丘有一匡之功。天水黠羌，渔阳群盗，乃迁秦州长史、防城大都督，封信都县开国伯。三年，滑州蚁聚，保障沉命，靡旗乱辙，乘冰渡河。丞相、大行台授假节抚军，行滑州刺史。

大统元年，授持节、西夏州刺史，加散骑常侍。郅支抱马，如闻耿秉之战；单于愿识，似畏王商之威。五年，迁使持节、镇东将军、都督东北三夏诸军事、西夏州刺史，增邑千户，改伯为公。既而江汉辽远，车书寂寞。蜀主的颅，未出檀溪之水；秦王飞雉，犹向南阳之城。六年，以公为使持节、都督三荆二襄南雍平信江随郢浙十二州诸军事、荆州刺史、东南道行台仆射。楚城邻境，实

有让田；吴人对营，无妨赠药。部内属城为人所讼，公遂集文武，肉袒自罚。兄弟不让，延寿责躬；吏民有过，翁归引咎。天子异之，玺书劳问，赠赙加币，王人接踵。大丞相书云：“此之美事，耳目之所未经。叹尚无极，故遣专使。”公善于抚驭，长于接引，山藪无弃，苞苴不行，示人赤心，与人颜色，盗不敢发，民不忍欺。至是将校耆老，于州城之南，起清德之楼<sup>⑤</sup>，勒贤臣之颂。杜镇南之作牧，当世树碑；窦车骑之临戎，生年刻石。方之今日，彼独何人！于时户口日增，荒莱毕垦，华实纷敷，黔黎茂豫。但恐衮职有阙，待公而补；鼎饪未和，须公而正。是以汉阴民望，荆南杞梓，并皆上书诣阙，连名乞留。河内之借，寇恂更惭谒帝；交州之请，士燮还著上表。

九年，授车骑大将军、仪同三司。十二年，除大行台尚书，仍为大丞相司马。以公识度严明，志节清俭，遂改公名俭，字庆明。非关书月，讵待看碑，幸得千亩不同，二山无废。十三年，加开府，馀官如故。十四年，除尚书右仆射，加侍中，进骠骑大将军。居上星执法，在文昌之位，以公才望，兼而有之。十五年，更除东南道行台仆射、都督十五州诸军事、行荆州事。十六年，大丞相总十六军，克清河洛，公又中分麾下，参谋帷幄，高选霸僚，公为长史。其年，加都督南道三十六州诸军事，馀官如故。南阳文学，更遇王基；章华究衣，还迎郭贺。

昔日伐蜀之谋，张仪与秦昭计合；平吴之利，羊祜与晋武意同。太祖始定成都，即有江陵之志。公密献其策，悬符深旨。粮运久积，梯冲立备，一战而举郾、郢，再战而烧夷陵，遂得席卷三荆。此又公之勋也。诏赏奴婢三百口。太祖与公书云：“由公立计，果如所谋。”令公作镇江陵，以安蜀地。后魏二年，改武川昌平郡开国公。历阳居民，非惟景丹之封；曲逆户口，岂但陈平之国。其年，授大将军。太和之中，曹真于府内受册；元封之末，卫青于军中即拜。公之此比，绰有馀荣。诏曰：“吴人未复，须助谋

谟，今使梁王兵马受公节度。”三年，加都督东南道五十二州诸军事，增邑万户。

维周革命，光宅钦明，作贰天官，允谐邦治。元年，授小冢宰。保定二年，治蒲州刺史、检校六防诸军事。四年，治襄州，仍授柱国大将军，余官如故。秩登四岳，阶平六府，岂不功重昭阳，名高蔡赐！控馭五十州，风行数千里。拔园葵而去织妇，无三惑而绝四知。一室之中，未免虚白，日膳之资，三杯而已。诏赐赠彩一千段，粟麦二千斛。天和元年，陝州刺史、都督八州二十防诸军事，解荆州总管，馀悉如故。路出王官，城临河曲；戍清陝右，高视棠阴。部领宴烦，晦明为疾。天和四年，谢病故京，薨于私第，春秋七十有八。銮辂降临，轩悬辍乐，九旒龙旆之锡，三河骑士之送。诏赠太保、凉夏灵银长河鄯甘瓜十州诸军事、凉州刺史。谥曰文。

公状貌丘墟，风神磊落。玉山秀立，乔松直上。烟霞之涯际莫寻，江海之波澜不测。少遭荼苦，在山服终，攀柏树枯，侵松兽死。尽忠事国，竭力从政，其门如市，其心若水。奇策密谋，百僚仰止，忠贞亮直，明王敬焉。至如风后阴阳之占，力牧星辰之度，魏公子之兵书，李将军之射法，莫不成诵在心，取为时用。居常服玩，或以布被松床；盘案之间，不过桑杯石鼎。遗令山陵一无所用，公私赠襚并不得受，止依太祖陵侧，无忘事君。墩等兄弟并至性，善居丧，号墓坟埏<sup>⑥</sup>，奉遵遗训。是以卫青之冢，仍陪汉武之陵；管仲之坟，即接齐桓之墓。

天和六年，天子以四海未宁，三方鼎峙，有怀将帅之志，言念封疆之臣。既画云台，乃题麟阁，更赠公为郟国公，邑五千户。追崇列辟，事极神魂；再改铭旌，恩隆封墓。公在民留爱，身后见思，吉日良辰，郊祠野祭。仪同赵超等六百九十七人，表求立庙，陈请象魏，有诏许焉。柱栋杏梁，绿墀青琐。按歌会舞，风盖霓裳。南浦送而行云，东风飘而零雨。是知汉阳郡前，非徒武侯之

庙；临淄城下，岂独栾公之社。呜呼哀哉！乃为铭曰：

道鍾《屯》、《剥》，世属云雷。地轴左转，天关北开。容车周室，系马秦台。乃齐七政，爰答三才。烈祖夔谐，九龚梁栋。取才逢猎，求贤入梦。匡赞官云，谋猷纪凤。律定公族，珪分职责。乃惟嗣德，实秉英灵。身图斗宿，面绕枢星。青衿敬业，童子离经。信陵虚右，干木分庭。忠孝纯深，枢机周密。孔光不言，曹参勿失。温席扇枕，承颜悦膝。冻浦鱼惊，寒林笋出。肃肃风政，沉沉器局。直似贞筠，温如瑞玉。清不置水，明非举烛。马愿如羊，金须似粟。上将克升，元戎既序。夏阳三捷，夷陵一举。凭轼下齐，陵江入楚。鼎反历室，钟归大吕。六卿咸事，天官是司。二南作伯，棠阴实治。清风有颂，绿竹闻诗。赠行之册，超然帝师。昔侍兰苑，今陪杏林。死生契阔，无违一心。风云积惨，山阵连阴。陵田野寂，松迳寒深。夏婴之陇，侨玄之墓<sup>①</sup>。马见千年，车回三步。左无长乐，前非武库。直望高碑，增悲行路。

### 周柱国大将军纥干弘神道碑

公讳弘，字广略，原州长城县人也。本姓田氏。虞宾在位，基于揖让之风；凤凰于飞，绍于亲贤之国。论其继世之功，则狄城有庙；序其移家之治，则长陵有碑。况复高庙上书，小车而对汉主；聊城祭鸟，长岳而驱燕将。公以胎教之月，岁德在寅；载诞之辰，星精出昴。是以月中生树，童子知言；水上浮瓜，青衿不戏。而受书黄石，意在王者之师；挥剑白猿，心存霸国之用。

魏永安中，任子都督，翻原州城，受陇西王节度。于时洛邑乱离，当途危逼，礼乐征伐不出于天子，举贤诛暴实在于强臣。太祖文皇帝始创霸功，初勤王室，秣马搜乘，誓众太原。公仗剑辕门，粗谋当世。随何远至，实释汉帝之忧；许攸夜来，即定曹王之业。永熙中，奉迎魏武帝入关<sup>②</sup>，封鹑阴县开国子，邑五百户。

太祖以自著铁甲赐公，云：“天下若定，还将此甲示寡人。”白水良剑，罢朝而赠陈宠；青骊善马，回军而赐李忠。并经舆服，足为连类。

大统三年，转帅都督，进爵为公。十四年，授使持节、都督原州诸军事、原州刺史。仙人重返，更入桂阳之城；龙种复归，还寻白沙之路。公此衣锦，乡里荣之。侍从太祖战河桥，复弘农，解华山围，平沙苑阵，每有元勋<sup>①</sup>，常蒙别赏。太祖在同州，文武并集，号令云：“人人如纆干弘尽心，天下岂不早定！”即授车骑大将军、仪同三司。前魏元年，转骠骑大将军开府。祈连犹远，即受冠军之侯；沙幕未开，元置长平之府。梁信州刺史萧韶、宁州刺史譙淹等，犹处永安，称兵渔阳。公受命中军，迅流下濑，遂得朝发白帝，暮宿江陵，猿啸不惊，鸡鸣即定。西平反羌，本有渔阳之勇；凤州叛氐，又习仇池之气。公推锋直上，白刃交前，万死一决，凶徒多溃。身被一百馀箭，伤肉破骨者九疮。马被十槊。露布申上，朝廷壮焉。

葛屨纠纠，魏有去旧之歌；零露漙漙，周受惟新之命。乃进爵封雁门郡公，食邑通前二千七万户。保定元年，授使持节、都督岷州诸军事、岷州刺史。陇头流水，延望秦关；川上峨眉，犹通蜀道。公不发私书，不燃官烛。兽则相负渡江，虫则相衔出境。四年，拜大将军，馀官如故。卫青受诏，未入玉门之关；窦宪当官，犹在燕山之下。公之此受，差无惭德。浑王叛换，梗我西疆。宕羌首窜，藩篱携贰。公受脤于社，偏师远袭，扬旌龙涸，系马甘松。二十五王，靡旗乱辙；七十六栅，鹑奔雉窜。既蒙用命之赏，乃奉旋师之乐。

天和二年，被使南征，带甲百万，舳舻千里。江源水起，海若乘流。船官之城，登巢悬爨。吴兵习流，长驱战舰。风灰箭火，倏忽凌城。公以白羽麾军，朱丝度水，七十馀日，始得解衣。朝廷以晋克夏阳，先通灭虢之政；秦开武遂，始问吞韩之谋。是以



驰传追公，以为仁寿城主。齐将段孝先、斛律明月出军定陇，以为宜阳之援。公背洛水而面熊山，阵中军而疏行首，乘机一战，宜阳衔璧<sup>⑤</sup>。增封五百户，进柱国大将军，司勋之册也。

建德元年，拜大司空。二年，迁少保。姬朝三列，少保为前；炎正五官，冬官为北。频频宠命，是谓贤能。三年，授使持节、都督襄郢昌丰唐蔡六州诸军事、襄州刺史。江、汉之间，不惊鸡犬；樊、襄之下，更多冠盖。既而三湘辽远，时遭鹏入；五溪卑湿，或见鸢飞。旧疾增加，薨于州镇。天子画凌烟之阁，言念旧臣；出平乐之宫，实思贤傅。有诏赠某官，礼也。即以四年四月二十五日，归葬于原州高平之镇山。属国玄甲，轻车介士，一依霍骠骑之礼，卫将军之葬。呜呼盛哉！

公入仕四十五年，身经一百六战。通中陷刃，疾甚曹参；刮骨傅药，事多关羽。而风神果勇，仪表沉雄，事亲无隐无犯<sup>⑥</sup>。学不专经，略观书籍；兵无师古，自得纵横。《青乌》甲乙之占，《白马》星辰之变，九宫推步，三门伏起，天弧射法，太乙营图，并皆成诵在心，若指诸掌。虏青犊之兵，甚有秘计；烧鸟巢之米，本无遗策。西零贼退，屈指可知；南郡兵回，插标而待。常愿执金鼓而问吴王，横雕戈而返齐地，有志不就，忠贞死焉。

世子恭等，孝惟纯深，居丧过礼。对其苦寝，则梓树寒生；闻其悲泣，则巢禽夜下。呜呼哀哉！乃为铭曰：

天齐水合，日观山连。兵强东楚，地远西燕。五卿咸正，三王并贤。灵龙更起，燧象还燃。自天之德，乃祖乃父。维岳降神，生申及甫。北门梁栋，西州云雨。勇誉燕城，名题汉柱。公始青衿，风神世载。猛兽不惊，家禽能对。剑学千门，书观六代。有竭忠贞，无违敬爱。乃数军实，乃握兵符。浇沙成垒，聚石成图。风云顺逆，营阵孤虚。灵雨钲鸣，燿火飞狐。淮阴受册，车骑登坛。公为上将，有此同官。下江烧楚，上地吞韩。推功玉案，定策珠盘。天有三阶，公承其命。国有六卿，公从其政。台